

豫

章

叢

書

第六冊

東

華

集

書

卷之四

黑水考證卷三

萬載李榮陞

潞江

大荒西經云西海之南流沙之濱赤水之後黑水之前有大山名曰崑崙之邱其下有弱水之淵環之按所謂西海者亦弱水之類也

西次三經云崑崙之

邱洋水出焉而西南流注於醜塗之水海內西經

云崑崙之墟洋水黑水出西南隅以東東行又東北

南入海

按洋水經次於黑水之前赤水之後以考今輿圖

惟潞江得相值其源有衆淖爾宛轉通流在大嶺
間非所謂下有弱水之淵環之者耶數千年滅沒
之文釐出可驗然大荒南經記諸水所窮之地洋
獨闕如一條云大荒之中乃塗之山青水窮焉乃
塗音近醜塗其地在崑崙南與青水不應青水當
爲洋水之誤文耳

穆天子傳云天子西征至于赤鳥北征超行濟于洋
水北征東旋至於黑水

按穆傳所次洋水與山海經同赤水西南爲洋水
洋水西南爲黑水此云東旋似發蹤少有委曲西

逕大曠原乃東歸也後文甚明

前漢地理志云益州郡犛唐縣周水首受徼外又有
類水西南至不韋行六百五十里後漢志云古爲犛
昆明永平十年置西部都尉治前書西南夷傳注云
犛卽今犛州昆明又在其西南

按犛唐縣在越犛郡治邛都縣西千餘里前書注
所云犛州蓋越犛也故昆明在其西南如犛唐則
昆明應在其北爲今怒夷地

水經葉榆下注云不韋縣故九隆哀牢之國也有牢
山云云世世不與中國通漢建武二十三年王遣兵

乘革船南下水攻漢鹿芴民天震雷疾雨南風起水
逆流船沈沒溺死數千人後復攻鹿芴王與戰
殺六王乃俱遣使詣越巂奏獻求內附永平十二年
置爲永昌郡治不韋縣秦始皇徙呂不韋子孫於此
故以名

按不韋今爲保山乃永昌府治以今圖考之潞江
帶其西蘭滄帶其東治地占兩川間得適中兩川
並東南流注謂哀牢王乘船南下不知當何屬從
保山北微西行六七百里出魯甸西北潞水自怒
夷番界來魯甸當漢舊唐地怒水卽類水可知也

地理志又云南中山曰昆彌水曰洛大抵皆依弱
音通轉

水經注云類水出嵩唐縣漢武帝置類水西南流曲
折又北流東至不韋縣注蘭倉水又云蘭倉水東北
逕不韋縣與類水合又東與禁水合又東逕不韋縣
北而東北流有瀘江之名

按酈注類水無專條附三十六卷若水條下謂類
水自嵩唐南流至不韋縣是矣過縣西境仍獨流
入海注乃謂注於蘭倉誤也

溫水條下云九德縣屬九真郡縣在郡南與日南接

自九德西通類口水源從西北遠荒寧州界來也

按晉書武帝時分益州之永昌四郡爲寧州寧州自蘭滄以東總於交趾麋泠入海無出九真日南者類水旣逕永昌西其入海之口應在西南界外緬國圖可證雖與九德西東相值而水源各別云九德通類口者特陸程耳

唐書地理志云自羊苴咩城西至永昌故郡三百里又西渡怒江至諸葛城二百里又南至樂城二百里又南入驃國境

按羊苴咩城今大理府治在點蒼山下蠻書云永

昌古哀牢地在玷蒼山西六日程此云三百里蓋山路也永昌西行百餘里得潞江按圖上游自哈拉烏蘇來過怒夷地名怒江入永昌境名潞江下流復有喳里江之名類怒均出於弱音然作哩者尤近

蠻書山川篇云高黎共山在永昌西下臨怒江左右平川謂之穹賤湯浪加萌所居也草木不枯有瘴氣自永昌之越賤途經此山一驛在山之半一驛在山之巔朝濟怒江登山暮方到山頂冬中山上積雪苦寒秋夏又苦穹賤湯浪毒暑酷熱河賤賈客在尋傳

羈離未還者爲之謠曰冬時欲歸來高黎共上雪秋
夏欲歸來無那穹賤熱春時欲歸來平中絡賂絕原
註絡賂財之名也

按高黎共山永昌志云高三十里蒙氏時封爲西
嶽或以爲崑崙岡之轉音其山在潞江西龍川江
東從永昌往騰越路所必經樊氏言其下臨怒江
而怒江竟無專條蓋傳本散佚耳

史記正義云弱水有二源皆出女國北阿耨達山卽
崑崙也南流合於女國東去國一里深丈餘濶六十
步非毛舟不可濟南流入海

文獻通考引

唐書西域傳上

上字疑當作云

東女亦曰蘇伐刺拏瞿咀羅

羌別種也西海亦有女自王故稱東女東與吐蕃党
項茂州接西屬三波訶北距于闐東南屬雅州羅女
蠻白狼夷東西九日行南北盡二十日有八十城以
女爲君居康延川巖險四繚有弱水南流縫革爲船
人居皆重屋王九層以十一月爲正武德時王湯滂
氏始遣使入貢開元間王及子再來朝與宰相宴曲
江封王曳昌爲歸昌王貞元九年王湯立悉與白狗
君南水君弱水君等詣劍南韋臯求內附散居西山
弱水雖自謂王蓋小小部落耳自失河隴悉爲吐蕃

羈屬至是猶上天寶所賜詔書云云

按酈氏水經注云水黑曰盧不流曰奴奴蓋弱之
轉音不必雍州有之此弱水在崑崙山南南流入
海與山海經所云崑崙山下赤水後黑水前之弱
水方名悉叶唐世著此名者固非以上證禹貢亦
未必能知山海經別有此水承夷俗所傳而自合
以此愈驗古記之得真也宋程氏大昌嘗欲以此
水當葉榆之源以爲足界梁雍二州傳同叔非之
謂東女弱水前此無稱黑水者稱之自程公始不
可據此亦不然凡地當考其實不當泥其名傳氏

不問此水下流之果否與葉榆相接第以前無黑
水之名疑之果爾將遂據以釋雍州之弱水平中
國以經相授山川名號隨代變易何況蕃夷而欲
其終古不失唐虞之稱哉特以前後各源驗之圖
籍此水應入潞江與蘭滄尙隔一山耳

雲南師旅志云元泰定帝致和元年怒江甸土官阿
哀你寇樂辰寨命雲南行省督兵捕之

又云洪武三十年平緬蠻刀幹孟逐宣慰司思倫三
十一年五月命沐春爲征南大將軍率都督何福往
討之福躋高良公山直搗南甸大破之還兵擊景罕

寨寨乘高據險堅守不下福糧且盡告急於春春率
五百騎乘夜至怒江詔旦徑渡令騎馳躡寨下揚塵
警之賊不意大軍卒至驚懼率眾降春乘勝擊崆峒
寨賊潰走幹孟乞降上以其反覆不之許尋禽斬之
平緬定思倫得還

又云正統二年麓川思任反侵南甸屠騰衝據潞江
自稱曰法四年正月命沐晟率都督方政等討之兵
至金齒卽今永昌府賊遣其將簡緬斷江立柵師不

得渡晟遣人諭降思任佯許諾晟信之無渡江意明
史云任發遣眾奪潞江沿江造船三百艘欲取雲龍

而簡緬數挑戰政怒造舟六十艘率麾下渡江擊簡緬追至景罕寨破其柵斬首三千獲象三十餘深入

史云以少兵

逼思任於上江伏四起求救於晟不應

往至夾象石又不進至空泥一軍皆沒

發燒江上積聚奔還至楚雄詔問失事狀晟懼罪暴卒五月以沐昂爲征南將軍進討捷於潞江

明史麓川司傳云正統六年以定西伯蔣貴爲平蠻將軍兵部尙書王驥提督軍務會諸道兵討麓川時任發遣賊將刀令道等十二人率衆三萬餘象八十隻抵大侯州欲奪景東威遠而驥將抵金齒任發遣

人乞降驥受之密令諸將分道入右參將冉保從東路攻細甸灣甸水寨入鎮康趨孟定驥與貴由中路至上江會騰衝左參將宮聚自下江據夾象石至期合攻之賊拒守嚴銃弩飛石交下如雨次日乘風焚其柵火竟夜不息官軍力戰拔上江寨斬刀放戛父子禽刀孟頊前後斬馘五萬餘以捷聞七年驥率兵渡下江通高黎貢山道齊集麓川焚其營任發父子三人從間道渡江奔孟養捷聞命還師

麓川司治在龍川江西而其東境與金齒潞江孟定相錯大抵倚潞江爲險故前後用兵必取上下

寨道乃通任發之致討舉朝皆非王振專權而逞
忿惟英國公張輔謂其受世職六十餘年屢抗王
師不可不討田汝成炎微紀聞亦云王振罪惡通
天若主征麓川則爲義正言順愚謂麓川外憑緬
甸內扼西南兩迤癰生要害豈得置之然亦何至
發兵十五萬轉餉半天下乎且賊首未除卽以奏
凱邀功迄至再舉三舉故當時亦多有論驥者承
平之久國力已覺竭蹶視明初將材兵練能以少
勝衆者其道異矣

永昌府志云潞江楊慎以爲卽水經之漏江音訛爲